

გადაწყვეტილება

N გ-22-20/277
16/06/2022

277-გ-22-1-4-202206161407



შპს „ახალი ქსელები“ მიერ წარმოდგენილი ინფორმაციის ნაწილობრივ კომერციულ საიდუმლოებად ცნობის საკითხის განხილვის შესახებ

საქართველოს კომუნიკაციების ეროვნულ კომისიაში (შემდგომში „კომისია“) შპს „ახალმა ქსელებმა“ 2022 წლის 2 ივნისის წერილით (კომისიაში რეგისტრაციის ნომრით Nშ-22-6/2195) მოითხოვა 2022 წლის 25 მაისის წერილის (კომისიაში რეგისტრაციის ნომრით Nშ-22-6/2054) დანართით წარმოდგენილი, კომისიის მიერ 2022 წლის 22 მარტის Nგ-22-16/151 გადაწყვეტილებით მოთხოვნილი ინფორმაციის - შპს „ახალი ქსელები“ მიერ არაქართული არხების ტრანზიტზე გაფორმებული ხელშეკრულებების კომერციულ საიდუმლოებად ცნობა. კომპანიამ საქართველოს ზოგადი ადმინისტრაციული კოდექსის 27² მუხლის თანახმად მოითხოვა წარმოდგენილი დოკუმენტაციის კომერციულ საიდუმლოებად ცნობა სრულად, გარდა იმ ნაწილისა, რომელიც შეეხება ხელშეკრულების საგანს, მოქმედების ვადას, გავრცელების ტერიტორიასა და ტექნოლოგიას. შპს „ახალი ქსელები“ განმარტებით, წარმოდგენილი დოკუმენტები შეიცავს კომერციული ფასეულობის მქონე ინფორმაციას, რომლის გამჟღავნებამაც, შესაძლოა, ზიანი მიაყენოს კომპანიის კონკურენტუნარიანობას.

შპს „ახალი ქსელები“ წარმოდგენილი ხელშეკრულებების დიდი ნაწილი წარმოდგენილი იყო არაქართულ, რუსულ ან/და ინგლისურ ენაზე. კანონმდებლობის შესაბამისად, კომისიამ შპს „ახალ ქსელებს“ 2022 წლის 5 მაისის წერილით (კომისიაში რეგისტრაციის ნომრით Nგ-22-08/1105) სთხოვა ამავე წლის 25 მაისამდე წარმოედგინა მოწოდებული დოკუმენტაციის ქართულ ენაზე თარგმნილი და ნოტარიულად დამოწმებული ასლები. კომისიის მოთხოვნის საფუძველზე შპს „ახალმა ქსელებმა“ 2022 წლის 25 მაისის წერილით (კომისიაში რეგისტრაციის ნომრით Nშ-22-6/2054), კომისიაში წარმოადგინა ნოტარიულად დამოწმებული, ქართულ ენაზე თარგმნილი დოკუმენტაცია.

საქართველოს ზოგადი ადმინისტრაციული კოდექსის 27² მუხლის პირველი ნაწილის მიხედვით, კომერციული საიდუმლოება განიმარტება, როგორც ინფორმაცია კომერციული ფასეულობის მქონე გეგმის, ფორმულის, პროცესის, საშუალების თაობაზე ან

ნებისმიერი სხვა ინფორმაცია, რომელიც გამოიყენება საქონლის საწარმოებლად, მოსამზადებლად, გადასამუშავებლად ან მომსახურების გასაწევად, ან/და რომელიც წარმოადგენს სიახლეს ან ტექნიკური შემოქმედების მნიშვნელოვან შედეგს, აგრეთვე სხვა ინფორმაცია, რომლის გამჟღავნებამ შესაძლოა ზიანი მიაყენოს პირის კონკურენტუნარიანობას. ამავე მუხლის მე-3 ნაწილის თანახმად, ინფორმაციის წარდგენისას პირი ვალდებულია მიუთითოს, რომ ეს ინფორმაცია მისი კომერციული საიდუმლოებაა. საჯარო დაწესებულება ვალდებულია 10 დღის ვადაში კომერციულ საიდუმლოებად მიიჩნიოს ამ მუხლის პირველი ნაწილით გათვალისწინებული ინფორმაცია, გარდა იმ შემთხვევისა, როცა ინფორმაციის ღიაობის ვალდებულება დადგენილია კანონით. თუ ინფორმაციის წარდგენისას საჯარო დაწესებულება არ მიიჩნევს ამ ინფორმაციას კომერციულ საიდუმლოებად, იგი იღებს გადაწყვეტილებას მისი ღიაობის თაობაზე, რასაც დაუყოვნებლივ აცნობებს შესაბამის პირს. გადაწყვეტილების მიღებიდან 15 დღის შემდეგ ინფორმაცია ხდება ღია, თუ პირმა, რომლის საკუთრებაცაა ეს ინფორმაცია, ამ ვადის გასვლამდე ზემდგომ ადმინისტრაციულ ორგანოში, ხოლო საქართველოს საპროცესო კანონმდებლობით დადგენილი წესით – სასამართლოში, არ გაასაჩივრა ინფორმაციის ღიაობის თაობაზე მიღებული გადაწყვეტილება, რაც დაუყოვნებლივ უნდა აცნობოს საჯარო დაწესებულებას.

საქართველოს ზოგადი ადმინისტრაციული კოდექსის 31-ე მუხლის პირველი ნაწილის შესაბამისად, კანონით გათვალისწინებული შემთხვევების გარდა, პროფესიული და კომერციული ინფორმაცია გასაიდუმლოვდება უვადოდ. კომერციული საიდუმლოება ღიად უნდა გამოცხადდეს, თუ მას აღარ გააჩნია ის ღირებულება, რის გამოც ასეთად იქნა მიჩნეული, ხოლო ამავე მუხლის მე-2 ნაწილის შესაბამისად, გადაწყვეტილება საჯარო ინფორმაციის გასაიდუმლოების და მისი ვადის გაგრძელების შესახებ ადმინისტრაციულ ორგანოს შეაქვს შესაბამის რეესტრში.

კომისია მიიჩნევს, რომ შპს „ახალი ქსელების“ მიერ წარმოდგენილი ხელშეკრულებები შინაარსობრივად ნაწილობრივ შეიცავს კომერციული საიდუმლოების მქონე ინფორმაციას. კერძოდ, წარმოდგენილი დოკუმენტაცია შეიცავს კომპანიისთვის შეთავაზებული პირობების, კომპანიის მიერ გადასახდელი თანხების, მხარეთა ფინანსური და არაფინანსური ხასიათის უფლება-მოვალეობების შესახებ ისეთ ინფორმაციას, რომლის გამჟღავნებით, შესაძლებელია, საჯაროდ გახდეს ცნობილი მხარეებს შორის თანამშრომლობის კომერციული ფასეულობის მქონე ინფორმაციის, მიმდინარე და სამომავლო გეგმებისა და კომერციული სტრატეგიის შესახებ, რაც ხელს შეუშლის შპს „ახალი ქსელების“ კონკურენტუნარიანობას ბაზარზე. კომისია ასევე მიიჩნევს, რომ წარმოდგენილ ხელშეკრულებებში ხელშემკვრელი მხარეების შესახებ ინფორმაცია, კერძოდ, ხელშეკრულებების ის კომპონენტი, სადაც საუბარია კომპანიისა და მისი კონტრაქტის თაობაზე არ განეკუთვნება კომერციულ საიდუმლოებას, ვინაიდან ინფორმაცია, რომ შპს „ახალ ქსელებს“ აქვს სახელშეკრულებო ურთიერთობა ამა თუ იმ სუბიექტთან მაუწყებლობის ტრანზიტთან დაკავშირებით არ გამოიწვევს კომპანიის კონკურენტუნარიანობის შეზღუდვას. შესაბამისად, მსგავსად კომპანიის მიერ მოთხოვნილი ხელშეკრულებების საგნის, მოქმედების ვადების, გავრცელების ტერიტორიისა და ტექნოლოგიისა, ხელშეკრულების მხარეები არ შეიცავს ისეთ მონაცემებს, რომელიც შესაძლოა მიჩნეულ იქნას კომერციულ საიდუმლოებად

საქართველოს ზოგადი ადმინისტრაციული კოდექსის 27²-ე მუხლის პირველი ნაწილის მიხედვით. აღნიშნულიდან გამომდინარე, კომპანიის მიერ წარმოდგენილი ხელშეკრულებები, გარდა იმ ნაწილისა, რომელიც შეეხება ხელშეკრულებების საგანს, მხარეებს, მოქმედების ვადებს, გავრცელების ტერიტორიასა და ტექნოლოგიას განეკუთვნება საქართველოს ზოგადი ადმინისტრაციული კოდექსით გათვალისწინებულ კომერციულ საიდუმლოებას. შესაბამისად, აღნიშნული დოკუმენტაცია უნდა იქნეს კომერციულ საიდუმლოებად ცნობილი.

საქართველოს კომუნიკაციების ეროვნული კომისიის 2003 წლის 27 ივნისის №1 დადგენილებით დამტკიცებული „საქართველოს კომუნიკაციების ეროვნული კომისიის საქმიანობის მარეგულირებელი წესების“ მე-19 მუხლის მე-4 პუნქტის და „საქართველოს კომუნიკაციების ეროვნული კომისიის მიერ „კონკურენციის შესახებ“ საქართველოს კანონის აღსრულების მარეგულირებელი წესის“ მე-5 მუხლის მე-3 პუნქტის თანახმად, „კონკურენციის შესახებ“ საქართველოს კანონის მე-20 მუხლითა და საქართველოს ზოგადი ადმინისტრაციული კოდექსით დადგენილი წესით კომისიაში წარმოდგენილი ინფორმაციის კონფიდენციალურად ცნობის შემთხვევაში, კომისია უფლებამოსილია პირს მოსთხოვოს აღნიშნული დოკუმენტის არაკონფიდენციალური ვერსიის წარმოდგენა და განუსაზღვროს შესაბამისი ვადა. კომისია წარმოდგენილი დოკუმენტაციის კომერციულ საიდუმლოებად ცნობის საკითხს განიხილავს „სს „სილქნეტის“, შპს „მაგთიკომის“, შპს „ახალი ქსელებისა“ და შპს „საქართველოს ცენტრალური კავშირგაბმულობის კორპორაციის“ საჩივრების დასაშვებად ცნობისა და შპს „მედია რაითს ჯორჯიას“, შპს „ტელეიმედის“, სს „მედია ჰოლდინგის“, შპს „მთავარი არხის“, შპს „ტელეკომპანია პირველის“, შპს „პოსტგ-ის“ და შპს „ფორმულას“ მიმართ საქმის მოკვლევის დაწყების შესახებ“ კომისიის (გ-21-16/545, 30.09.2021) გადაწყვეტილებების შესაბამისად „კონკურენციის შესახებ“ საქართველოს კანონის საფუძველზე დაწყებული ადმინისტრაციული წარმოების ფარგლებში. აქედან გამომდინარე, შპს „ახალ ქსელებს“ უნდა დაევალოს აღნიშნული დოკუმენტაციის ნოტარიულად დამოწმებული, ქართული თარგმანის არაკონფიდენციალური (კომერციული საიდუმლოების დაფარვით) ვერსიის წარმოდგენა.

ყოველივე ზემოაღნიშნულის გათვალისწინებით, საქართველოს ზოგადი ადმინისტრაციული კოდექსის 27²-ე მუხლის, 31-ე მუხლის, საქართველოს კომუნიკაციების ეროვნული კომისიის 2003 წლის 27 ივნისის №1 დადგენილებით დამტკიცებული „საქართველოს კომუნიკაციების ეროვნული კომისიის საქმიანობის მარეგულირებელი წესების“ მე-19 მუხლის მე-4 პუნქტის და „საქართველოს კომუნიკაციების ეროვნული კომისიის მიერ „კონკურენციის შესახებ“ საქართველოს კანონის აღსრულების მარეგულირებელი წესის“ მე-5 მუხლის მე-3 პუნქტის შესაბამისად, კომისიამ, კენჭისყრის შედეგად:

გ ა დ ა წ ყ ვ ი ტ ა :

1. ნაწილობრივ დაკმაყოფილდეს შპს „ახალი ქსელების“ მოთხოვნა და ცნობილ იქნეს კომერციულ საიდუმლოებად 2022 წლის 25 მაისის (კომისიაში რეგისტრაციის ნომრით Nმ-22-6/2054) წერილით, დანართის სახით წარმოდგენილი შპს „ახალი ქსელების“ მიერ არაქართული არხების ტრანზიტზე გაფორმებული ხელშეკრულებები სრულად, გარდა

ხელშეკრულების საგნის, მხარეების, მოქმედების ვადების, გავრცელების ტერიტორიისა და ტექნოლოგიის ნაწილისა;

2. შპს „ახალი ქსელების“ 2022 წლის 25 მაისის წერილით (კომისიაში რეგისტრაციის ნომრით Nშ-22-6/2054) წარმოდგენილი ხელშეკრულებები იმ ნაწილში, რომელიც შეეხება ხელშეკრულების საგანს, მხარეებს, მოქმედების ვადებს, გავრცელების ტერიტორიას და ტექნოლოგიას დარჩეს ღიად;

3. შპს „ახალ ქსელებს“ დაევალოს ამ გადაწყვეტილებით კომერციულ საიდუმლოებად ცნობილი, ნოტარიულად დამოწმებული, ქართულად თარგმნილი ხელშეკრულებების არაკონფიდენციალური (კომერციული საიდუმლოების დაფარვით) ვერსიის კომისიაში წარმოდგენა არაუგვიანეს 2022 წლის 30 ივნისისა;

4. წინამდებარე გადაწყვეტილების პირველი პუნქტით განსაზღვრული ინფორმაცია შპს „ახალი ქსელების“ კომერციულ საიდუმლოებად ჩაითვალოს შპს „ახალი ქსელების“ მიერ ინფორმაციის განსაიდუმლოების შესახებ კომისიისათვის მიმართვამდე ან იქამდე, სანამ იგი არ დაკარგავს იმ ღირებულებას, რის გამოც ასეთად იქნა მიჩნეული;

5. წინამდებარე გადაწყვეტილების მე-2 პუნქტით განსაზღვრული ინფორმაცია გახდეს ღია კანონმდებლობის შესაბამისად წინამდებარე გადაწყვეტილების მიღებიდან 15 დღის შემდეგ;

6. დაევალოს კომისიის აპარატის ადმინისტრაციას, აღნიშნული გადაწყვეტილების საქართველოს ზოგადი ადმინისტრაციული კოდექსის 31-ე მუხლის მე-2 ნაწილის შესაბამისად, სათანადო წესით შესაბამის რეესტრში შეტანა;

7. დაევალოს კომისიის აპარატის ადმინისტრაციას აღნიშნული გადაწყვეტილების შპს „ახალი ქსელებისთვის“ გაგზავნა (ნ. ჯავახიძე) და კომისიის ოფიციალურ ვებ გვერდზე (www.comcom.ge) გამოქვეყნება;

8. გადაწყვეტილება ძალაში შევიდეს მისი სარეზოლუციო ნაწილის კომისიის სხდომაზე გამოცხადებისთანავე;

9. გადაწყვეტილება, გარდა მისი მე-2 და მე-5 პუნქტებისა, შეიძლება გასაჩივრდეს ქ. თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დავით აღმაშენებლის ხეივანი, №64), ამ გადაწყვეტილების კომისიის ოფიციალურ ვებ გვერდზე (www.comcom.ge) გამოქვეყნების დღიდან ერთი თვის ვადაში;

10. წინამდებარე გადაწყვეტილების მე-2 და მე-5 პუნქტები შეიძლება გასაჩივრდეს შპს „ახალი ქსელების“ მიერ, ქ. თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დავით აღმაშენებლის ხეივანი, №64) გადაწყვეტილების მიღებიდან 15 დღის ვადაში, რაც შპს „ახალმა ქსელებმა“ დაუყოვნებლივ უნდა აცნობოს კომისიას.

11. კონტროლი აღნიშნული გადაწყვეტილების შესრულებაზე დაევალოს კომისიის აპარატის ადმინისტრაციას (ო. ვოტ).

ვახტანგ აბაშიძე




თავმჯდომარე - მ.შ.

ეკატერინე იმედაძე



წევრი

ნათია კუკულაძე



წევრი

